



Mahein Nia Lian Nú. 32, 28 Marsu 2012

Pratika *Money* Politika¹ iha Eleisaun Prezidensial 2012

(Premeira Volta, 17 Marsu 2012)

Introdusaun

Partisipasaun sidadaun iha prosesu eleisaun jeral, partikularmente iha eleisaun prezidensial 2012 iha premeira volta 17 Marsu 2012 liu bá ne'e, tuir Fundasaun Mahein (FM) nia observasaun durante kampaña [politika] eleitoral to'o loron votasaun hatudu katak iha pratika politika balu ne'ebé hafraku prosesu demokrasia.

Iha Fundasaun Mahein (FM) nia relatoriu ida ne'e, halo ánaliza bá prosedimentu legais sira ne'ebé estadu liu husi Sekretariu Tekniku Administrasaun Eleitoral, STAE, hatun ne'ebé viola prinsipiu sufraju universal ka direitu hili ne'ebé universal, lori partidu politiku sira tenki monu bá tentasaun sira ne'ebé viola prinsipiu demokrasia nian. Indikasaun sira ne'ebé husi observasaun FM nian hatudu durante kampaña eleitoral to'o loron antes votasaun maka pratika *Money* politika. Pratika ida ne'e akontese tanba konsekuensia husi lei eleitoral nian ne'ebé kolia kona-bá eleitor sira obrigatoriu vota iha fatin ne'ebé sira nian kartaun eleitoral rejistu bá.

Direitu Partisipasaun Siadadaun Nian iha Vida Polítika

Direitu partisipasaun sidadaun nian iha vida politika nu'udár direitu fundamental ida ne'ebé konstitui iha Konstitusaun Repúblika Demokrátika Timor-Leste. Konstituisaun RDTL artigu 46 kona-bá direitu bá partisipasaun polítika, deskrebe katak sidadaun ida-idak iha direitu atu partisipa, rasik ka ho nia representante eleitu tuir demokrasia, iha vida polítika no iha país nia asuntu polítiku.² Sidadaun ida-idak iha direitu atu konstitui no atu partisipa iha partidu polítiku.³ Nune'e mos, Konstitusaun RDTL artigu 47 kona-bá direitu bá hili hatete sidadaun ida-diak ho

¹ *Money* Politika iha kontestu Timor-Leste, povu Timor barak liu, hela iha suku ka aldeia iha rurais sira ne'ebé barak maka seidak hatene programa politiku kandidatu Presidente ka partidu sira nian ho kle'an. Entau dala barak liu ekipa susesu sira husi partidu ka husi kandidatus sira mos lori uluk sasan ba povu iha fatin balun hodi influensia ba povu nia votu ba sira, maske povu sira iha area refere lahatene kle'an kona-bá sira nia programa, ne'e biban ida.

Biban seluk, kompañia balun ne'ebé fo ajuda transporte ka ajuda material saida deit hodi kandidatu sira ka partidu balun nia naran hodi ba fahe iha suku ka aldeia. Tan partidu ka kandidatu sira ne'e halo pratika sira hanesan ne'e entau kuandu sira sa'e ba ukun, sira labele halo sira nia kna'ar ho diak, tamba sira momentu kampaña povu lahatene los sira nia programa, entau povu labele husu tusan politik atu serbi sira tuir lalaok estadu nian.

² Konstitusaun Repúblika Demokrátika Timor-Leste, Artigu 46 Númeru 1.

³ Konstitusaun Repúblika Demokrátika Timor-Leste, Artigu 46 Númeru 2.

tinan boot-liu sanulu resin-hitu iha direitu atu vota no hetan eleisaun.⁴ Direitu bá hili nian, ezersísiu ema ida-idak nian no konstitui devér síviku ida.⁵

Iha Konstituisan RDTL artigu 63 koalia mos kona-bá sidadaun sira nia partisipasaun política ne'ebé kostitui mos katak sistema demokrátiku nia kondisaun no meu importante ida maka mane ho feto sira nia partisipasaun direta no ativa iha vida política.⁶ Atu garante partisipasaun sidadaun nian iha vida política, eleisaun hanesan aktu demokrátiku ida ne'ebé sidadaun hotu-hotu ezerse sira nia direitu politiku. Konstituisain RDTL artigu 65 kona-bá eleisaun koalia mos órgaun soberanu eleitu sira no podér lokál nia órgaun sira sei hili iha eleisaun, ho votu universál, livre, diretu, sekretu, pesoál no periódiku.⁷ Inkui mos, Resenseamentu eleitorál obrigatóriu, ofisiozu, úniku no universál no sei aktualiza tinan-tinan.⁸

Husi norma konstituisional ida ne'e, atu garante partisipasaun sidadaun nian iha eleisaun, bá orgaun soberania nia eleitu hanesan Prezidenti Repúblika. Lei Nú. 08/2011 de 22 de Junho, Segundu Alterasaun Lei Nú. 07/2006 de 28 de Dezembru (Lei Eleitoral Prezidenti Repúblika), hatete *Presidente da República é eleito mediante sufrágio universal, livre, direito, igual, secreto, pessoal e periódico.*⁹ Nune'e mos Kapitulu V kona-bá Votasaun, artigu 40 *Local de votação, o eleitor deve votar no suco indicado como sua Unidade Geografica de Resenseamento, conforme conste no cartão eleitor.*

Regulamentu STAE Nú. 04/STAE/X/2011 kona-bá prosedimentu bá votasaun, kontajen bá votu no apuramentu bá rezultadu bá eleisaun prezidensial no parlamentar, artigu 8 deskreve eleitor tenki obrigatōriu bá vota iha suku laran iha fatin ne'ebé hatudu sira nia area geografika resensamentu, distansia no hatudu hodi bazeia bá informasaun hakerek iha kartaun eleitor.¹⁰

Problema partisipasaun sidadaun nian iha prosesu eleitoral bá eleisaun prezidensial periodu 2012 to'o 2017, públiku kestiona rekizitus legais sira regula kona-bá eleitor sira obrigatōriu bá vota iha suku ne'ebé sira rejistu. Sidadaun barak sei la partisipa iha eventu demokratiku ida ne'e tamba hela dook husi sira nia suku liu-liu maioria estudante ne'ebé hala'o nia estudu iha Kapital Dili inklui comunidade balu. Atu fasilita sidadaun sira bá vota iha sira nia suku, partidu politiku balu ho iniciativa apoiu transporte bá sira nia militante no comunidade balu tula bá sira nia suku. Partidu politiku balu fo sai apoiu ne'e publikamente liu husi media, ikus *Comissão Nacional Eleições* (CNE) konsidera hanesan pratika *Money* politika.¹¹

Money politika hanesan aktu ida liu husi forma oin-oin, hanesan liu husi apoiu material ka osan husi individu, grupu ka partidu politiku atu hetan influencia politika ka hametin no hadau poder

⁴ Konstitusaun Repúblika Demokrátika Timor-Leste, Artigu 47 Númeru 1.

⁵ Konstitusaun Repúblika Demokrátika Timor-Leste, Artigu 47 Númeru 2.

⁶ Konstitusaun Repúblika Demokrátika Timor-Leste, Artigu 63 Númeru 1

⁷ Konstitusaun Repúblika Demokrátika Timor-Leste, Artigu 65 Númeru 1

⁸ Konstitusaun Repúblika Demokrátika Timor-Leste, Artigu 65 Númeru 2

⁹ Lei Nú 08/2011 de 22 de Junho, Segundu Alterasaun Lei Nú 07/2006 de 28 de Desembro (Lei Eleitoral Prezidenti Repúblika), Artigu 2, númeru 1).

¹⁰ Regulamentu STAE Nú. 04/STAE/X/2011, Artigu 8 Númeru 1.

¹¹ Jornal Nacional Diario, Kuarta 14 Marsu 2012

politika iha estadu soberania ida. Tuir FM nia observasaun katak partidu politiku sira uza meus hanesan transporte atu fasilita nia militante no komunidade balu tula bá sira nian suku tuir votasaun.

Istoria *Money* Politika iha Timor-Leste to'o Eleisaun Presidencial 2012

Iha istoria Timor-Leste pratika *Money* politika hahu husi tinan 1975, partidu politiku balu hetan apoiu osan, material hanesan kilat no bens sira seluk husi rai liur. Apoiu sira ne'e influensia makáas situasaun politika Timor-Leste, too ikus mosu funu maun-alin ka konfliktu politika interna no invazaun militar Indonezia iha loron 07 fulan Dezembru tinan 1975. Nune'e mos, indikasaun hatudu katak wainhira Timor-Leste iha administrasaun Provinsia 27 Repúblika Indonezia nian mos mosu *Money* politika wa'in ba wa'in. Razaun tanba iba biban ne'ebá politiku-nain no militar sira uza osan no bens sira seluk atu hametin sira nian influensia politika, atu hametin sira nia poder, uza osan atu hetan informasaun, uza osan selu ema atu óho ema seluk no uza osan atu kaer ema seluk, to'o konsulta popular loron 30 fulan Agustu tinan 1999.

Premeira ves eleisaun hala'o depois konsulta popular, iha administrasaun Nasoens Unidas (ONU) ne'ebé lidera husi *United Nations Transitional Administration in East Timor* (UNTAET), Timor-Leste hili ninia Assembleia Konstituante ne'ebé ikus mai nakfilak sai Parlamentu Nasional, prosesu eleitoral la'o ho susesu, transparente no imparcial. Kontinua to'o 2002 eleisaun prezidensial ho sirkunatasia ne'ebé hanesan no Timor-Leste restaura ninia independensia iha loron 20 fulan Maiu tinan 2002.

Iha tinan 2007, ba dahuluk estadu Timor-Leste lidera rasik prosesu eleitoral bá eleisaun prezidensial no eleisaun Parlamentar. Opiniaun públiku kestiona kona-bá pratika *Money* politika maibé la iha provas konkretu bá asuntu refere. Ita bele nota katak hahu husi eleisaun prezidensial to'o eleisaun parlamentar partidu polítiku sira liu husi nia kampaña polítika. Mobiliza militante no simpatizante husi fatin barak ho apoiu transporte husi partidu politiku sira ho número signifikante tebes inklui apoiu bens sira seluk. Maibe públiku duvida ba rekursu finanseira ne'ebé sustenta atividade hirak ne'e mai husi ne'ebé? Karik opiniaun ne'e bele los ka sala maibé hanesan fenomena importante ida atu sidadaun hotu bele partisipa iha debate públiku hodi hanoin lesuk hare bá prosesu eleitoral iha eleisaun prezidensial periodu 2012-2017.

Eleisaun Prezidenti Repúblika periodu 2012-2017, problema partisipasaun sidadaun iha eleisaun sai hanesan problema fundamental ida. Partidu politiku balu ho inisiativa hodi fo apoiu transporte bá estudante hanesan militante partidu no komunidade balu ne'ebé hakarak fila bá sira nia distritu atu tuir votasaun rejistu iha Sekretariadu Partidu refere. Apoiu ida ne'e, *Comissão Nacional Eleições* (CNE) konsidera katak apoiu transporte bá militantes no komunidade balu konsidera hanesan *Money* politika.¹²

Iha loron 14 Marsu 2012 kalan telejornal Tetun Radio no Televizaun Timor-Leste (RTTL) fo sai katak estudante no komunidade lubun-wain hadau malu transporte públiku atu fila bá distritu.

¹² Jornal Nacional Diario, Kuarta 14 Marsu 2012

Tanba ne'e, estudante no comunidade lamenta bá desizaun estadu nian, ne'ebé sidadaun hotu-hotu tenki vota tuir sira nia kartaun eleitor rejistu bá. Governu liu husi premeiru ministru fo sai liu husi telejornal Tetun RTTL iha loron 15 fulan Marsu tinan 2012 katak governu koordena ona atu apoiu transporte bá estudante no comunidade tula bá distritu atu tuir votasaun no iha loron ne'e duni estudante no comunidade Distritu Oe-Cusse aranka kedas bá sira nia distritu ho apoiu transporte governu nian no sidadaun seluk aranka iha loron tuir mai. Maibé, antes ne'e partidu politiku balu fo sai ona iha media katak sira sei apoiu transporte bá ninia militante atu tula bá sira nia suku tuir votasaun.

Faktu sira ne'ebé hatudu iha terenu katak partidu *Frente Revolucionariu Timor-Leste Independente* (FRETILIN), oferese no apoiu transporte bá nia militante no comunidade balu atu bá distritu, iha loron 15 fulan Marsu tinan 2012. Komisariu Politika Nasional (KPN) partidu FRETILIN, Elizario Ferreira hatete militante FRETILIN, estudante, comunidade no negosiante sira ne'ebé hela iha Dili atu fila bá distritu kareta la iha, *Comite Central* FRETILIN (CCF) prepara kareta tula sira bá distritu no liu husi prosesu sira tenki mai tau naran iha CCF no sira nia preparasaun hahu husi loron 5 fulan Marsu tinan 2012 atu fasilita transporte bá nia militante.¹³

Nune'e mos Adjuntu Sekretariu Jeral partidu FRETILIN Jose Reis hatete katak lei eleitoral difikulta tebe-tebes sidadaun ida ezerse sira nia direitu votu. Tamba ne'e, partidu FRETILIN fo apoiu ba ninia militante ne'ebé hakarak fila bá foho atu tuir votasaun.¹⁴

Tuir fontes informasaun ne'ebé ho inisial E. A., estudante husi Distritu Viqueque hatete katak "Ami bá rejistu iha CCF-Comoro no ami hein iha ne'ebá mak kareta tula ami bá distritu."¹⁵ Nune'e estudante ho inisial A. S hatete "Se ami la mai rejistu iha ne'e konserteza ami lakon ami nia diretu bá vota tanba ne'e mak ami mai rejistu iha CCF hodi ajuda ami bá distritu tuir votasaun."¹⁶

Maibé, pratika ida ne'e, Komisariu CNE Pe. Martinho Gusmão konsidera hanesan kategoria *Money* politika tanba hanesan sosa votu no konserteza ema tenki vota duni bá kandidatun refere. Nia dehan, ida ida ne'e kategoria bá manipulasaun eleitoral, korupsiun eleitoral tanba fasilita ema atu bá vota no ema ne'e determinadu ona katak vota bá nia [kandidatu prezidenti husi Fretilin] tanba ne'e kategoria bá *Money* politika.¹⁷

Adjuntu Sekretariu Jeral FRETILIN Jose Reis hatan bá CNE nian interpretasaun hatete katak lei ida ne'ebé mak bandu, no la iha lei koalita kona-bá pratika ida ne'e, apoiu transporte bá militante ne'e la sala buat ida.¹⁸ Maibé, Kodigu Penal Timor-Leste (2009) artigu 234 número 1) konsidera pratika ida ne'e hanesan sosa votu.

¹³ Jornal Nacional Diario, Kuarta 13 Marsu 2012

¹⁴ Jornal Nacional Diario, Kuarta 14 Marsu 2012

¹⁵ Fontes informasaun ho inisial E. A. Kinta, 15 Marsu 2012

¹⁶ Fontes informasaun ho inisial A. S. Kinta, 15 Marsu 2012

¹⁷ Jornal Nacional Diario, Kuarta 14 Marsu 2012

¹⁸ Jornal Nacional Diario, Kuarta 14 Marsu 2012



Iha imajen ne'e militante kandidatu Prezidenti FRETILIN Lu-Olo sae hela kareta atu ba distritu hodi tuir vota iha CCF-Comoro, Kinta 15 Marsu 2012. Dok FM

Iha ámbitu hanesan, tuir FM nia observaun katak Partidu Demokratiku (PD) apoiu mos transporte bá nia militante no komunidade balu hodi tula bá distritu atu tuir votasaun. Partidu Demokratiku mos mobiliza nia militante atu bá vota iha distritu nu'udár responsabilidade moral partidu nian bá nia militante. Esforsu ne'ebé PD halo mak mobiliza nia militante husi Distritu Covalima, Bobonaro, Ainaro, Ermera, Aileu, Manufahi, Manatuto, Liquisa, Baucau, no Distritu Lautem ne'ebé resposabiliza husi dirasaun sentral partidu nian. Militante PD husi Distritu Viqueque responsabiliza husi estrutura distrital mak mobiliza. Úniku Distritu Oe-Cusse dirasaun sentral partidu nian halo negosiasaun ho Ró Nakroma maibé la konsege mobiliza tanba kondisaun klima tasi la primite.¹⁹

Atu mobiliza militante PD no estudante inklui komunidade balu ne'ebé fila bá sira nia distritu, mekanizmu mobilza sira mai hein iha Sede PD nian Kolmera-Dili, terminal, estudante konsentra kampus UNTL inklui tula mos iha sira nia hela fatin.²⁰ Joven ida militante PD ho inisial M. S hela iha Kampung Alor-Dili ho nia maluk sira husi Distritu Lautem, iha loron 16 fulan Marsu tinan 2012 ho apoiu PD nian sira aranka bá Lautem. Nia hatete katak ho apoiu transporte ne'ebé partidu oferese bá sira hanesan meius ida atu nune'e sira bele vota iha iha sira nia distritu tanba sira la iha meus seluk atu fasilita sira bá distritu.²¹

FM hare katak, ironiku liu tan lideransa dirasaun sentral PD nian koordena no kontaktu Kompañia Privadu ne'ebé ligasaun diak ho lideransa PD nian atu fasilita transporte kuaze

¹⁹ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

²⁰ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

²¹ Fontes informasaun ho inisial M. S. Sesta, 16 Marsu 2012

kareta 10 resin atu tula militante inklui komidade balu la'os militante PD iha parte Merkadu Hali-Laran hodi tula bá distritu sira iha parte rai klaran.²²

Fontes konfirmadu FM nian ida haktuir pratika hanesan iha mos kandidatu indepedenti Dr. Jose Ramos Horta. Problema Money politika ne'ebé Ramos Horta aplika laos liu husi transporte maibé fahe *Kapotí* ba nia militante no apoante sira iha Subdistritu Letefoho, Distritu Ermera. Apoiu material sira ne'e tula husi Dili bá Subdistritu Letefoho hamutuk kareta tolu hodi fahe halekar ba nia apoante no komidade balu. Fontes konfirmadu ne'e haktuir katak "Ami so vota bá kandidatu ne'ebé ajuda ami maske ho sasan simples maibé bele ajuda ami".²³

Fontes konfirmadu seluk hatete katak apoiu Dr. Jose Ramos Horta nian bá komidade sira iha Distritu Ermera nu'udár apoiu husi prezidenti da repúblika, fora husi orariu atividade kampaña eleitoral.²⁴ Maske nune'e, FM konsidera katak apoiu *Kapotí* bá komidade iha tempu kampaña maske la iha intensaun politika ruma maibé nu'udár kandidatu ida, iha tendensia makáas atu influensia komidade sira hodi vota no fo sira nia votu bá kandidatu refere.

Fundasaun Mahein (FM) hare katak desizaun ne'ebé partidu politiku foti nu'udár responsabilidade organizaun partidu politiku bá nia militante, nu'udár kontribuisaun ida bá dezvoltamentu demokrasia iha eventu demokrátku ida ne'e. Iha ambitu seluk, partidu politiku sente katak partisipasaun menus husi nia militante hanesan ameasa ida bá rezultadu eleisaun bá kandidatu presidente ne'ebé sira nia partidu kandidata bá. Tanba, partidu politiku konsidera regulamentu ne'ebé iha, viola ninia militante nian direitu atu vota.²⁵ Maibé, FM hare katak desizaun ida ne'e la iha espasu juridiku hodi fo fatin bá partidu politiku sira atu toma responsabilidade ida ne'e. CNE konsidera ida ne'e hanesan *Money* politika²⁶, maske seidauk iha lei ne'ebé regula kona-bá pratika ida ne'e.

Lider partidu politiku sira konsidera interpretaun CNE nian sala no la justu tanba konsidera CNE la halo sosializaun kona-bá partisipasaun sidadaun nian iha eleisaun. Lider partidu politiku sira mos kestiona katak tuir lolos CNE iha kompetensia ida ne'e atu hato'o bá governu mobiliza sidadaun hotu atu partisipa iha eleisaun.²⁷

Iha parte seluk, lider partidu politiku sira konsidera CNE nia interpretaun la iha baze legal ruma. Tanba ho razaun katak iha lei eleitoral la koalia kona-bá partidu polítiku sira mobiliza nia militante bá vota hanesan *Money* polítika no lider politiku sira konsidera mobilizasun ne'ebé sira halo hodi responde bá artigu 40 lei eleisaun Prezidenti Repúblika.²⁸ Tuir lolos governu iha responsabilidade tomak atu fasilita transporte bá komidade no estudante. Maibé governu

²² Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

²³ Fontes Entrevista Fundasaun Mahein nian husi apoante Kandidatu Independenti Dr. Jose Ramos Horta. Kinta, 22 Marsu 2012

²⁴ Fontes Entrevista Fundasaun Mahein nian. Sesta, 23 Marsu 2012

²⁵ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

²⁶ Jornal Nacional Diario, Kuarta 14 Marsu 2012

²⁷ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

²⁸ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

antes ne'e la iha planu atu apoiu transporte bá comunidade, ikus mosu lamentasaun husi comunidade no estudante inklui partidu polítiku balu apoiu transporte bá nia militante no comunidade hodi tula bá distritu. Governu foin hetan atensaun bá kazu refere.

Maibé, FM nian interpretasaun kona-bá apoiu transporte bá militante ka comunidade balu hanesan pratika *Money* polítika. Tanba tuir definisaun husi *Money* polítika katak apoiu ho forma saida deit tantu apoiu material ka bens sira seluk no osan atu hetan influencia polítika hodi hetan votu hanesan pratika ida sosa votu.

Maske interpretasaun lider partidu polítiku sira nian katak apoiu transporte bá militante, estudante no comunidade la'os pratika *Money* polítika maibé FM hare katak interpretasaun bá pratika ida ne'e viola Kodigu Penal Timor-Leste (2009), Kapitulu IV ne'ebé koalia kona-bá Krime Eleitoral, artigu 234 Obstrusaun bá Liberdade atu Hili, konsidera hanesan sosa votu.²⁹

Potensia Menus Partisipasaun Sidadaun iha Eleisaun Segundu Volta

Hare bá comunidade nia eziejnsia no inisitiva partidu polítiku hatudu iha premeira volta eleisaun prezidensial ne'ebé liu dadauk, entre partisipasaun sidadaun nian iha eleisaun no lei eleitoral bá Prezidenti Repúblika Lei Nú. 08/2011 de 22 de Junho, Segundu Alterasaun Lei Nú. 07/2006 de 28 de Dezembru artigu 40 inklui regulamentu ESTAE Nú. 04/STAE/X/2011, artigu 8. Governu presiza kria kondisaun atu nune'e sidadaun hotu bele participa masimu iha eleisaun segundu volta.³⁰ FM nia observaun katak sidadaun hamutuk 21.80%³¹ husi total eleitor 626.503³² la vota iha eleisaun prezidensial premeira volta.

FM hare katak iha potencia boot bá segundu volta eleisaun prezidensial, sidadaun barak mak sei la participa nu'udár konsekuensia ida husi lei eleitoral ne'ebé preve kona-bá partisipasaun sidadaun nian iha eleisaun tuir unidade jeografika resenseamentu eleitoral. Problema ida ne'e sai mos preukupasaun bá deputadu parlamentu nasional ne'ebé kestiona kana-bá lei eleitoral Prezidenti Repúblika Nú. 08/2011 de 22 de Junho, Segundu Alterasaun Lei Nú. 07/2006 de 28 de Dezembru artigu 40, husu bá governu atu halo alterasaun bá artigu refere.³³

Iha inidkasaun makáas katak número partisipasaun sei tun signifkante iha eleisaun segundu volta wainhira governu la iha resposta ruma bá situasaun hirak ne'e. Maske iha premeira volta governu halo ona esforsu lubuk balu atu fasilita transporte bá sidadaun sira ne'ebé fila bá sira nia suku atu vota maibé número eleitor continua tun makáas iha premeira volta.³⁴

FM kestiona katak partisipasaun menus sidadaun nian iha prosesu demokrátiku ne'ebé sidadaun hotu-hotu ezerse nia direitu polítiku nu'udár hakerek iha Konstitusaun Repúblika Demokrátika Timor-Leste. Signifika governu mos kontribui viola direitu sidadaun nian iha ámbitu partisipasaun iha vida política. Situasaun hirak ne'e, FM nian opsaun katak governu tetu entre

²⁹ Kodigu Penal Timor-Leste (2009). Artigu 234, número 1.

³⁰ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

³¹ Independente. Segunda, 26 Marsu 2012

³² Radio no Televizaun Timor-Leste (RTTL). Domingu, 18 Marsu 2012

³³ Telejornal Tetun, Radio no Televizau Timor Leste (RTTL). Segunda, 19 Marsu 2012

³⁴ Entrevista ho Nelson Belo. Diretor Fundasaun Mahein (FM). Kinta, 22 Marsu 2012

opsaun alterasaun lei eleitoral Prezidenti Repúblika artigu 40 ka fasilta transporte bá sidadaun sira bá iha sira nia suku atu tuir vota?

Lider partidu polítiku sira hare katak apoiu transporte husi partidu polítiku no governu rasik atu mobiliza militante, estudante no comunidade balu la naton tanba mobiliza bá tiha ona sira nia distritu maibé partidu polítiku no governu rasik la iha kapasidade finanseira desmobiliza husi sira nia distritu mai fali iha Dili. Tanba preukupasaun husi estudante sira katak afeta makáas sira nia estudu no estudante preukupa tebe-tebes tanba falta sira nia eskola no balu la tuir ezame.³⁵

Konkluzau

Iha relatoriu simples ne'e, FM konklui katak problema ne'ebé fundamentu maka partisipasaun menus sidadaun nian iha eleisaun atu ezerse sira nia direitu polítiku, ikus partidu polítiku sira monu bá pratika *Money* polítika. Pratika ida ne'e akontese tanba partidu politiku sira konsidera ameasa makáas votu bá kandidatu ne'ebé sira kandidata tanba ho apoiu ne'ebé sira halo atu garante manan iha eleisaun.

FM hare katak pratika *Money* polítika sei hafraku prosesu demokrasia ne'ebé la'o dadauk tanba pratika ida ne'e sei hamate prinsipiu demokrasia iha ámbitu liberdade no imparcialidade. Nune'e mos sei hafo'er imajem poder polítiku husi povu iha estadu direitu demokrátiku. Nu'udár kauza ida husi Timor-Leste seidauk iha lei kona-bá pratika *Money* polítika, tantu apoiu mai husi partidu polítiku, pesoal ka impreza privadu iha rai laran ka apoiu mai husi rai liur bá partidu polítiku sira.

Maske la taka dalan bá apoiu kooperasaun entre partidu polítiku, entre pesoal ho organizasaun ruma maibé presiza lei atu regula kona-bá limitasaun bá apoiu sira atu nune'e bele garante prinsipiu imparcialidade no transparansia.

FM apresia tebes wainhira governu liu husi CNE nia supervizaun, publikamente deklarala liu husi media televizaun, radio no jornais. Kona-bá subsidiu orsamentu bá partidu politiku no kandidatu Prezidenti Repúblika, kanaliza tuir rekizitu legais no prosesu administrativu ne'ebé rigorozu.

Rekomendasaun

Saida mak governu presiza halo?

Bazeia ba faktus pratika *Money* polítika iha leten, Fundasaun Mahein (FM) rekomenda bá:

1. CNE presiza halo investigasaun profundu bá pratika *Money* polítika ne'ebé komete husi partidu polítiku no kandidatu prezidenti repúblika iha prosesu eleitoral ne'ebé liu dadauk.
2. Governu presiza tetu opsau partisipasaun sidadaun nian entre alterasaun lei eleisaun Prezidenti Repúblika artigu 40 no apoiu transporte bá sidadaun sira bá iha nia suku atu tuir vota.

³⁵ Entrevista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012

3. Rekomenda bá governu tenki anula tiha artigu 40 lei eleisaun Prezidenti Repúblika.
4. Governu presiza halo lei kona-bá pratika *Money* polítika atu kontrola apoiu osan ka bens ruma husi pesoal ka partidu politiku.
5. Karik iha apoiu ruma husi rai laran ka rai liur bá partidu polítiku no pesoal polítiku ne'ebé iha influensia polítika, CNE presiza halo supervizaun no investiga apoiu ne'e mai husi ne'ebé deit no apoiu ne'e ho forma saida ka ho osan ka sasan deklara ba CNE no STAE.
6. Governu presiza halo lei ne'ebé fo forte bá CNE no STAE atu halo sansaun penal.

Referensia

Intervista

Intervista ho Samuel Mendonça. Adjuntu Sekretariu Jeral Partidu Demokratiku (PD). Kinta, 22 Marsu 2012.

Intervista ho Nelson Belo. Diretor Fundasaun Mahein (FM). Kinta, 22 Marsu 2012.

Fontes Intervista Fundasaun Mahein nian husi apoiante Kandidatu Independenti Dr. Jose Ramos Horta. Kinta, 22 Marsu 2012.

Fontes Intervista Fundasaun Mahein nian. Sesta, 23 Marsu 2012

Fontes informasaun ho inisial E. A. Kinta, 15 Marsu 2012

Fontes infformasaun ho inisial A. S. Kinta, 15 Marsu 2012

Fontes informasaun ho inisial M. S. Sesta, 16 Marsu 2012

Lei

Konstitusaun Repúblika Demokrátika Timor-Leste

Regulamentu STAE Nú. 04/STAE/X/2011

Lei Nú 08/2011 de 22 de Junho, Segundu Alterasaun Lei Nú 07/2006 de 28 de Desembro (Lei Eleitoral Prezidenti Repúblika).

Kodigu Penal Timor-Leste (2009).

Media Jornal no TV

Jornal Nacional Diario, Kuarta 13 Marsu 2012

Jornal Nacional Diario, Kuarta 14 Marsu 2012

Independente. Segunda, 26 Marsu 2012

Telejornal Tetun, Radio no Televizaun Timor-Leste (RTTL), 14 Marsu 2012

Telejornal Tetun, Radio no Televizaun Timor-Leste (RTTL), 15 Marsu 2012

Radio no Televizaun Timor-Leste (RTTL). Domingu, 18 Marsu 2012

Telejornal Tetun, Radio no Televizau Timor Leste (RTTL). Segunda, 19 Marsu 2012